

NOTA DE PRENSA

A Coruña, 28 de setembro de 2016

Daniel Asorey gaña o X Premio de Narrativa Breve Repsol

A obra gañadora leva por título NORDESTE e será publicada pola Editorial Galaxia.

O escritor e profesor santiagués, Daniel Asorey, gaña a X edición do Premio Narrativa Breve Repsol en Lingua Galega pola súa obra NORDESTE. Así se comunicou esta mañá no acto que tivo lugar na Refinería de Repsol na Coruña e estivo presidido polo secretario xeral de Política Lingüística, Valentín García e mais o xerente da Área Institucional e Cultural da Fundación Repsol, Gonzalo Vázquez, nunha rolda de prensa na que estiveron acompañados por Luis Felipe Llamas, director da refinería, e mais por Armando Requeixo, voceiro do xurado desta edición.

O portavoz destacou de "Nordeste" a habelencia para recrear dous mundos en interconexión como son o do épico sertão brasileiro e unha república galega imaxinaria, amais de pór de relevo o sobresaliente acabado estilístico das páxinas que conforman a peza, inzadas de poderosas imaxes e de fascinantes símbolos.

Trátase dunha obra de "intensa capacidade de fabulación, suxestiva amálgama de tempos e espazos e atractiva arquitectura do relato", razóns polas que outorga por maioría o X Premio de Narrativa Breve Repsol a esta espléndida "Nordeste" nunha convocatoria que salientou tanto polo elevado número de orixinais a concurso (un total de 38 cos que se viu incrementada a participación con respecto ás edicións anteriores) coma pola notable calidade das obras presentadas.

O devandito xurado integrárono o investigador e crítico literario Armando Requeixo, a profesora e escritora Carme Fernández Pérez-Sanjulián da Asociación de escritoras e escritores en lingua galega, o escritor e académico da Real Academia Galega Euloxio R. Ruibal, o director editorial de Galaxia Carlos Lema e o escritor gañador da pasada edición, Marcos S. Calveiro, representando a Fundación Repsol.

O gañador

Daniel Asorey Vidal naceu en Santiago de Compostela no ano 1970, onde reside na actualidade, e é profesor de lingua galega e literatura no ensino secundario.

Recibirá este X Premio de Narrativa Breve Repsol, dotado con 12.000 € e coa publicación da obra pola Editorial Galaxia, nun acto que se celebrará antes de final de ano na Coruña.

Conta no seu haber con publicacións literarias anteriores, como “De soños e memorias” (coautor, publicada por Espiral Maior), “O álbum da derrota” (en “Madrigal. Revista de Estudos Galegos”) e varias narracións en distintos números da revista “Olysbos”. Participou en varios congresos sobre literatura, sociolingüística e lingua galega e é tamén autor de abondosos relatorios, artigos e reseñas sobre literatura galega e lingua, así como de materiais didácticos desta especialidade específicos do ensino secundario.

Foi finalista este ano do Xerais e fíxose co I Certame de Relato Curto Cidade Vella en 1988, cun dos galardóns da III edición do Premio Investigación Lingüística e Literaria 17 de maio en 1991, co 1º Premio de Narración Curta no I Certame Literario e de Investigación Terra de Melide en 2001 e gañou ex aequo o XI Certame de Narracións Manuel Murguía no ano 2002.

O Premio Narrativa Breve Repsol

O Premio de Narrativa Breve Repsol botou a andar no ano 2006 e na primeira edición gañou o xornalista Miguel Sande con “Se algún día esta muller morta” e o profesor da USC e xornalista Xavier Lama acadou un accésit con “O insomnio dos centauros”. Na segunda, en 2007, a gañadora foi Anxos Sumai coa obra “Así nacen as baleas”. Na terceira, en 2008, o narrador, dramaturgo e debuxante humorístico Xosé Luís Martínez Pereiro obtivo o galardón polo traballo “A verdade como mal menor”.

Na cuarta, en 2010, o premio foi para o escritor Xurxo Sierra, pola peza “Os fíos”. A quinta, no ano 2011, gañouna Fernando Díaz Castroverde Gómez, por “Microbios e outros paquidermos”. En 2012 fíxose co premio María López Sández, con “A forma das nubes.”. Na edición 2013, o premio recaeu en Berta Dávila, por “O derradeiro libro de Enma Olsen”; na de 2014, en Santiago Lopo pola peza “A diagonal dos tolos” e na de 2015 en Marcos S. Calveiro, por “Fontán”.

Refinería Repsol A Coruña .

981 18 1734 /14 00

www.acoruna.repsol.com

www.fundacionrepsol.com